



TAPAK 8

Chris Cornell asüpila sentong May 26 nü akatsü



TAPAK 10

Donald Trump-i Israel semdangdang Iran aitsür

VOL. XIV NO. 214 (ADOK 214)

DIMAPUR

TUESDAY

MAY 23, 2017

5.00

38 Wokha Assembly Constituency NPF office anentsür

Dimapur, May 22 (TYO): Disciplinary Action Committee (DAC)-i junger ta ashiba aser party temzüng nung tashi agüja aliba nung ajemdaker, NPF tir Dr. Shürhozelie Liezietsü-i 38 Wokha Assembly Constituency NPF office anentsür, ta sangdong ka nung metetdaksüogo.

38 Wokha Assembly Constituency NPF office nungji Parent body, Women Wing,

Youth Wing, aser Farmers Wing ajak dena lir aser May 20, 2017 anogo nungi anentsür, ta NPF President, Dr. Shürhozelie-i sangdong nung shia lir.

38 Wokha AC nung ketdangpur tasentem meshim tashi Wokha Division ketdangpurtemi iba constituency repranga atatsü tuyur, ta Dr. Shürhozelie-isa sangdong nung metetdaksüogo.

PM Modi-i Assam semdangtsü atema sentong tulu renemdar

Guwahati, May 22 (Agencies): BJP-i aniba NDA sorkar küm asem abensaba anogo, May 26 nü Guwahati nung aliba Khanapara Veterinary ground nung Ato kilonser, Narendra Modi-i lokti senden tuluka nung jembitsü sentong renemdar.

Yaküma kasa tesem nung Sarbananda Sonowal Assam Chief Minister atema tenangzükba agiba mapang nunga Ato kilonseri jembia liasü.

Hokolbarnü lokti senden nung nisung 1,50,000 adentsü südi, ta BJP-i metetdaksüogo.

BJP general secretary, Dilip Saikia-i, "Hokolbarnü sentong ya akhümket sentong ka asütsü. Iba sentong takok angutsü atema onoki inyakdar. Iba sentong nung nisung lakh ka ser tesadangbosa adentsü nükjiding lir, ajisüaka

iba dak tali arua adentsü atema onoki inyakdar," ta metetdaksü.

Deobarnü state BJP Tir, Ranjit Kumar Das-i state nung district ajak nungi BJP lenirtem den videoconference senden ka mena liasü, aser iba senden nung Modi-i state semdangtsü aliba onük tongti süa jembi.

Yaküm May 24 nü kasa tesem nung jembiba sentong nung nisung lakh 2 jungnüa adenshia liasü.

Hokolbarnü Ato kilonser, Modi-i Tinsukia district kübok Sadiya nung, Asia nung apu talangtiba semzüksütsü, Changsari nung AIIMS centre semzüksütsü aser Dhemaji district kübok Gogamukh nung Indian Council of Agricultural Research amenoktsü atema lung azünga yutsütsü.

Nagaland nung arem-min aser shirurudem wazüka ayutsüla: PCCF



May 22, 2017 nü Capital Convention Centre Kohima nung International Day for Biological Diversity amungdang PCCF I. Panger Jamir, NSBB ketdangsertem aser kaketshirtem külemi agiba noksa angur.

Kohima, May 22 (TYO): Nagaland litsübo tilaka dang saka süngdonglidong aser shiruru balala aika lir, ta Principal Chief Conservator of Forest & Head of Forest Force, Department of Forest, Environment & Climate Change, I. Panger Jamir-i tanü ashi.

Hombarnü Capital Convention Centre nung Nagaland State Biodiversity Board (NSBB)-i ayongzüka International Day for Biological

Diversity sentong nung jembidang I. Panger Jamir-i ashiba agi, "Nagaland nung Tragopan, Mithun, Naga mersü tashitiba, rhododendron talangtiba, tsük talangtiba, kanga manguba orchid- Red panda, Bulbophyllum, wild rose, wild pepper amala lir aser Nagaland ya the Indo-Burma biodiversity nung shilem ka lir."

Asen state nung angiosperms tapu 2400, angiosperms tapu 9, orchids tapu 340, aou tapu 22

lir aser shirurudem rongnung mammals tapu 100 den tema, ozü tapu 400 aser tanga shirurudem aika lir, ta paisa shisem.

"Asenoki asen arem-min aser idakji aliba shirurudem wazüka aser kümzüka ayutsüla kechiyong aika samaa odar. Asenoki tang meinyak nungbo, taruba putu tashi nung aika samadoker alitsü," ta I Panger-isa ayongzük.

(Maneni tapak 11 nung...)

Army tongti-i Major Gogoi nem sempet agütsü



Srinagar, May 22 (Agencies): Major Leetul Gogoi-i Jammu & Kashmir nung telungpur anema raraba nung tasütait mapa inyakba atema Hombarnü Army tongti, Bipin Rawat-i pa nem sempet agütsüogo.

Taküm Kashmir kübok Budgam nung lung amshia longkak aitertemi sepaitem indang gari ka amaktsü merandang ibaji nokdangtsü asoshi Gogoi-i longkak aiter ka army jeep nung lisü agi alenlok, aser ibaji ajanga sepaï ti kümzük. Iba noksaji social media nung prokshiba sülen pa nungtugu aküm.

Social media nung iba noksa prokshiba sülen Mysuru-Kodagu nungi BJP MP, Pratap Simha-i Gogoi pusama twitter ajanga, "Tasütait Maj Gogoi anema temerenshi ka agütsüsüsa süra, asenoki pa pusama linük tesem

ajaklen campaign ka tenzükdi," ta lemsatop. Iba sülen social media nung aikati Gogoi pusama liasü.

Army sangdong ka ajanga, Major Leetul Gogoi-i Jammu & Kashmir nung telungpur anema tasütait mapa inyakba asoshi pa nem COAS Commendation Card agütsüogo, ta metetdaksü.

Arishi küm 38 Major Gogoi ya Assam nungi aluyimer ka jabaso lir.

Pa arishi küm 18 asüdag sepaï nung aden aser Assam Regiment 3rd Battalion nung sepaï ka liasü. Iba sülen pa Dehradun nung amenoka aliba Army Cadet College (ACC) nung ketdangser aküm. Ajiser, 2008 küm pai Army nung lieutenant jenjang angu.

Army Service Corps (ASC) ketdangser, Gogoo-i Kashmir nung Rashtriya Rifles tenzüksü atema mulungteta liasü.

Congress-i lanur lennirtem ajanga temelenshi bener arutsü: K Therie

Kohima, May 22 (TYO): Naga nungeri sorkar ketdangsubaren nung temelenshi aginür aser iba temelenshiji Congress-i bener arutsü renema lir, ta Nagaland Pradesh Congress Committee (NPCC) tir Kewekhape Therie-i ashi.

Sangküm küm tetenzüklen agitsü aliba state general election nung Congress-i lanurtem shilem agidaktsütsü aser lanur candidate tem shimtsü aser ibaji ajanga temelenshi adoktsü, ta pai ashi.

Naga nungeri State Assembly nung tang aliba züngsemtem laktetogo. Parnok (MLA tem) tenarong jakogo aser temeli tatsük kümogo, kechiyong tesüiba Assembly menyonga arudang, parnoki nübortem asoshi onük kecha benoka mejembi, ta Therie-isa ashi.

Naga nungeri narongjaker aser temeli tatsük yimten yimsüsürtem menügdaker aser tang teinyakdak MLA tem ya tanaben shimra, parnok maneni shirong-sa asütsü aser sorkar ketdangsubaren kasa dang asütsü, ta paisa metetdaksü.

Linük nung yimsüsür tajungtibatem akümtsüsa asen Naga lanurtem lir. Taruba election nung lanurtemi Congress nung

adentsü aser temelenshi atema inyaktsü imlar, ta NPCC Tir-isa shisem.

Paisa ashiba agi, Congress lenisüba nung tazüng tuluka lir, kechiyong 2013 elections nung Congress ticket nung adokertem NPF nung denogo. Anungji, lanurtemi iba maongka agia, temelenshi bener arutsü atema shilem agitsüla.

All India Congress Committee (AICC)-i sorkar aser party jenjang nung tashi decentralize asütsü lemtetogo. Teküpokba jenjang nung party züngsemtemi yimten yimsüsübaren nung shilem agitsü atema iba telemetba ya agiogo, ta Therie-isa shisem.

AICC aser PCC-i inyaka aotsü sentongtem, tangatetba mesüra teinyaktsütem shisadanga yanglutsü aser training o workshops ayonga agitsü. Ajisüaka, NPCC mesüra AICC ajanga candidate meshimtsü. 2018 elections atema candidate tem shimtsü maparenji Assembly Constituency Congress Committee (ACCC) nem tashi agütsüogo.

Osangbenertem Nagaland nung tawa tasen tentetba yimtenren telok- Democratic Progressive Party (DPP) indang

asüngdangdang, Therie-i "iba telok tentetba ajanga Naga People's Front (NPF) lemsatsü kechiyong NPP nung züngsemtemji NPF nungi aortem lir" ta langzü.

Nagaland state nung BJP aser RSS anema raratsü atema dang masü saka jenjang ajak nung terenlok bener arutsü atema Congress ama secular party ka nüngdak. Tamangba yimsü nüjiso agütsüba secular party ji Congress dang lir aser Congress-i Naga nunger maittsü kümzüka yutetsü, ta K Therie-isa metetdaksü.

2018 election nung Congress-i takok angutsü. NPF-i küm 15 tashi sorkar ketdangsüa arudang nübortem parnok maginür, külen BJP anema nokdaker. Anungji, taruiba election nung secular force nem vote agütsütsü aser Nagaland nung secular force ji Congress dang lir. NPF dena tanüngba teloktemji RSS aser BJP indang yimtenren tashikang lir, ta paisa ashi.

DPP tentetba ajanga NPF nung telemsa adoktsü. NPF, BJP aser DPP tsüngda vote lemsaba ajanga Congress-i takok tulu angutsü, ta paisa shisem.

Mkgnunga Intl. candlelight memorial service amung



May 21, 2017 nü Mokokchung nung Candlelight Memorial Service agiba sentong nung ARTC Medical Officer, Dr. Temsunenla Lkr (abelen) aser NMP+ Tir Temsuwabang (ajichi noksa) nati jembidang tangokba noksa nung angur.

Mokokchung, May 22 (TYO): May 21, 2017 nü alima ajunga nung "Ending AIDS Together" omen nung ajemdaker 34buba International Candlelight Memorial Service ayongzüka amungba den külemi Mokokchung jila nunga Life Founding Centre Alempang Baptist Arogo den külem sür NMP+, DAPCU aser ARTC Mokokchung-i Alempang Baptist Arogo nung sentong tajung ka ayongzüka HIV/AIDS tashidak agi asürtem bilemteta mungogo.

ARTC Medical Officer, Dr. Temsunenla Longkümer-i alima ajunga nung iba anogo amungba indang ashidang, 1983 küm ibai San Francisco (US) nung mezüing tenzüka mungyonga aruba otsü ashi.

Iba anogo amungba ya tongtibangsa HIV/AIDS agi asürtem bilemteta den külemi akümlirtem nem iba indang tali

rajema kümdaktsüba mapang ka lir, ta lai ashi.

Iba ama sentong balala agiaka aser angashiaka, asenoki koma inyaker? ta asübaji tongtibangba lir, ta laisa ashi. "Tanübo iba tashidak den raratsü asoshi mozümora tabensa adoka lir, anungji ajak longjemer asen lokti nungi iba tashidak samatsütsü asoshi merangdi," ta laisa ayongzüka.

Alempang Baptist Arogo Pastor Rev. Temsü S-ia mapang tatsüka agidang, iba wadang ya nisung ka kisüingi makoktsü, anungji longjemer iba tashidak anema raratsü asoshi tayongzüka agütsü. Iba tashidak agi atongertemi meshitetba timtem aika ajurua alitsü, ajisüaka Tsüngrem dak dang teimla ayutsü asoshi paisa ayongzüka liasü.

Sentong nung NMP+ ketdangsür Temsüwabang-i jembidang, küm nung tashidak

tapu balala asoshi anogo ka agiteta mungtsür, ajisüaka HIV/AIDS tashidak atemabo anogo ana shiteta amunger, ta ashi. Iba ama sentong aiben liaka kümshi teimba-teimba dang züiner, anungji, "asenoki ibai züzüa masü saka süoki ia agitsüla," ta paisa ashi.

Iba tashidak agi tonger alirtemia ochishia temai adoktsüla, yamaji iba tashidak aketertemji lokti nung mesendoki parnok dang aochitsüla aser temeim mapa benshia maongka agütsütsüla, ta paisa mepishia ashi. "Iba tashidak aketertemi iba tashidak nem mekokdaksütsüla aser iba tashidak agi metongi alirtemia ibai kanga junga angatetsü nüngdaker," ta paisa shisem.

Sentong nung telok kari ken ajanga Tsüngrem osang aben aser sentong nung adener ajaki asürtem bilemteta candle tsükloka akhüm agüja liasü.

Life Spring Corner, Dimapur nung LTSA senden kadar

Dimapur, May 22 (TYO): Association Nagaland senden Life Spring Corner, Dimapur nung May 22, 2017 nü Liangmai Baptist Association (LBA) leniba kübok Liangmai Theological Students

Iba dak sendakba nung LTA züngsemtem, shirnok mezüingnü medenteti liasü, parnoka tanüingba sentongtem nungbo adentsü mepishia metetdaksür, ta paisa ashi.

Iba dak sendakba nung LTA züngsemtem, shirnok mezüingnü medenteti liasü, parnoka tanüingba sentongtem nungbo adentsü mepishia metetdaksür, ta paisa ashi.

ITI, Mkgnung Construction Workers atema training agidar



May 22, 2017 nü Industrial Training Institute (ITI), Mokokchung nung hopta ka piyong construction workers training nung Mokokchung ADC, Sachin Jaiswal IAS-i jembiba noksa nung angur.

Mokokchung, May 22 (TYO): Year of Construction Workers (2017) nüngtem nung Zynorique team-i ayongzüka hopta ka piyong construction workers atema training ka tanü Industrial Training Institute (ITI) Mokokchung nung tenzükogo.

Iba sentong nung jembidang Mokokchung Addl. Deputy

Commissioner, Sachin Jaiswal-i training agirtem dang iba maongka agia teka mapa nung asentenshitsu ayongzüka.

Paisa, nisung kati pei inyakba mapa agi nümatanga alitsüla, kechiyong mapa ajakji kasa tongtibang, ta metetdaksü.

Paisa training agirtem dang training tembanga agiba sülen

ajaki pei nükjidong atongtsü atema mera tilala agia nendaka inyaksü ayongzüka.

Marepkong ward Chairman-ia tayongzüka o jembia liasü aser Marepkong ward Pastor-i sarasadema liasü.

Iba sentong ya Principal ITI, Mokokchung Er. T. Imlisunep Ao leniba nung agi aser nisung 40-i iba training nung tendar.

Kohima Press Club-i mangyimer

Kohima, May 22 (TYO): Kohima Press Club (KPC) tatong Tir, Atul Sarma kinüingsü tetsü, Aikon Devi (arishi küm 72) Hombarnepdang Guwahati nung asüba osang angashia Kohima Press

Club-i mangyimer, ta tanü KPC General Secretary, Alice Yhoshü-i sangdong ka nung metetdaksü.

KPC züngsemtemi mangyimer kibong den asüko lemsatepba den külemi, ajak

takoksang Tsüngremi iba ama mangyim mapang nung parnok nem tesünep agüjang, aser asür tanela anisüngzükdakjang ta sarasademtsür, ta kasa sangdong nungsa shia lir.

OFFICE OF THE YAJANG "C" MEDEMSANGER VILLAGE COUNCIL

P.O. MANGKOLEMBA, B.P.O. LONGCHEM
DIST. MOKOKCHUNG, NAGALAND

TENÜNGSANG AGÜTSÜR

Taküm HSLC 2017 tatidang nung Govt High School Yajang nungi nenok kaketshirtem tagütsür ajaki takok tajung ngutet nung, nenok ajak dang Yajang C Medemsanger Putu Menden ajanga tenüngsang agütsür. Talisa Headmaster-i anir tesayurtem ajaki bendanga aguja sayuba ajanga iba takok ngutetogo, ta nenok nem-a tenüngsang agütsür.

Ano, iba dak alia jila balala nung sensosanger kaketshirtem shirnoki taküm HSLC & HSSLC tatidang nung takok nguogo nenok ajak danga pelaba lemsateper.

Tarutsü nung nenok azüngba wadang nung temoatsü sudakjang- ni ta sarasadema atar.

Imtionen Aier
Chairman, Yajang 'C' Village Council

Mon nung otsüno tetoktepba ayonga kaogo



May 22 nü Mon nung otsüno tetoktepba sentong nung shilem agirtem aser MDLSA team külemi tangokba noksa nung angur.

Dimapur, May 22 (TYO): May 22, 2017 nü Government Higher Secondary Mon 'A' nung Mon District Legal Services Authority (MDLSA)-i ayongzüka "Climate Change is a Threat" omen nung otsüno (essay) tetoktepba sentong tajung ka agiogo.

Iba tetoktepba nung kaketshir ajak agi parnok 43 aden aser mezüingbuba jenjang, tanabuba aser tasembuba jenjang nung takok angurtemji- C. Ateih Konyak, Jewang

Konyak aser Lemya nunger liasü.

Takok angur parnok asem nem senpet- sen 3000, 2000 aser 1000 agütsü, iba den külemi shilem agir ajak nema certificates agütsüogo.

Iba tetoktepba nung tendangertemji MDLSA nungi Panel Lawyer asem- N. Mannon, Dominic Kaiba aser M. Moba nunger liasü. Iba sentong nung N. Mannon-i okila jembi aser M. Moba leniba nung sentong agia liasü.

Peren nung Horti building tasen semzük

Dimapur, May 22 (TYO): May 20, 2017 nü District Hq. tasen, Peren nung Horticulture Parliamentary Secretary, Kejong Chang-i District Horticulture Office indang building tasen semzüksüogo.

Iba building semzüksüba sülen lokti den jembidang tongti tesemdanger Parliamentary Secretary-i iba building ketdangsüa yangluba atema department ketdangsertem aser staff tem nem tenüngsang agütsü. Iba building yangluba

indang osang Er. Vizodel Khatso-i tongmelang agi metetdaksü aser Director, N. Amos Ao-i okila jembia liasü.

Kasa sentong nung Peren Deputy Commissioner, Zarenthung Ezüing, Village Council Chairman, New Peren aser Kejanglwa nungeria jembia liasü.

District Horticulture Officer, Talimongba-i tepela anküp o jembi aser iba sentong ya Horticulture Secretary, Alan Gonmei, IAS leniba nung agia liasü.


Khutak Prayer Centre nung Youth Camp akatsü

Mokokchung, May 22 (TYO): Mokokchung district kübok Longjang nung aliba Khutak Prayer Centre nung lanurtem asoshi "Youth Camp" sentong ka June 2-4, 2017 tashi "Tang arung, aser asenoki külemi shisadangi, ta Kibubai ashir," (Isaia 1:18) omen nung ajemdaker ayongzüka lir, ta Hombarnü osang ka ajanga metetdaksü.

Iba sentong nung Rev. T. Meren Jamir-i Tsüngrem osang abentsü aser Alempang Youth

Ministry nungi lanurtemi iba sentong nung 'Tetushi aser Tekülem' agitsü sentong renema lir, aser iba sentong nung adeni arur ajak asoshi chiyungtsü angati agütsütsü saka abensüoshi (bedding) bo peisasa renemer arutsü asoshi tayongertemisa metetdaksü.

Iba Youth Camp sentong ya Longsa nunger Takamanen'er kibongi tenla agüja katsür. Iba sentong nung tejangrar ajak arua shilem agitsü asoshi parnokisa shisem.



Guwahati, May 22 : Ato kilonser Modi Hombarnü Guwahiti nung public rally sentong nung shilem magi tsungda security akangshiba noksa nung angur.

Tarun Gogoi Dhola-Sadiya apu semdangtsü memela

Guwahati, May 22 (Agencies): Taoba mapang Assam chief minister Tarun Gogoi tanü Tinsukia district nung Dhola-Sadiya apu semdangtsü nungi nokdang. Iba apu ya Ato kilonser Narendra Modi-i Hokolbarnü lapoktsütsü. Osang ajanga ashiba agi, 'security' dak sendakba nung pa iba apu semdangtsü memela.

Iba apu ya 2011 küm state aser Centre na prongla nung Congress tashi nung aliba mapang yanglu tenzük aser tang Ato kilonser-i May 26 nü iba apu lapoktsütsü sentong aliba ajanga iba tesem elite Special Protection Group (SPG) kübok lir.

"Parnoki ni security aser temzüng ozüng dak sendakba

keno nung tibelemtsü aliba ajang, ta ashia apu semdangtsü asoshi memela. Ni kiralongrar ka asü masü? ni ozüng raksatsüa na? kechiba parnoki ni apu semdangtsü memela?" ta Gogoi shiba nem Z Plus security cover agüja ali pai asüngdang.

Congress sorkari Brahmaputra ayong nung iba apu tamendakdak azünga apu tembanga yangluogo saka tang BJP puri tenüngsang ajak agitsü meranger, ta paisa ashi.

"Iba ya onoki süngtong tema anepalur parnoki süngjang achiba den kasa lir. Parnok nem süngjangji chidakjang saka ni atemba süngtonga reprangi motettsü asü? Ta Congress leneir-i ashi.

Gogoi iba apu aliba tesem-i tanep ao saka security temi pa

iba apu aotsü asoshi memela. Pai ashiba agi, yimden yimsüsübaren nung miim maparen kar aliba ajanga pa nokdang.

Tinsukia district deputy commissioner Ranjan Chakravartty den osang agitepdang pai ashiba agi, "Iba apu ya lapoktsü asoshi sentong renemer aliba ajanga shibang lir. SPG puri iba apu jungjunga reprangshiogo aser mapa inyaker dak alaka shinga meyoktsü ta metetdaksüogo. Ato kilonser Narendra Modi-i iba apu lapoktsütsü aser iba ajanga Arunachal aser Assam nung aliba nüburtem kanga ajangzüktsü ta imlar."

Km 9.16 talang apu ya linük nung apu rongnung talangtiba lir.

Arunachal sorkari aluyimer nem tetemlok melei sen aputsütsü

Itanagar, May 22 (Agencies): Arunachal Pradesh sorkari aluyimer nem 'crop loan' tetemlok maketi agütsütsü lemtetogo.

Tang financial year nung aluyimer ajunga nem bank ajungai crop loan mesüra kisan credit card ajanga sen lakh 3 tashi nung tetemlok shilem pezü ya Chief Minister's Krishi Rinn Yojana (CMKRY) sentong ajanga agütsütsü asoshi sorkari lemtetogo, ta state finance department ajanga metetdaksü.

"Sorkari sen tetemlok nung teyari agütsüba aser iba dak tali teyari agütsüba ya Centre-i bank ajak aser aluyimer ajak nem RBI aser NABARD sentong ajanga agütsür," ta iba sangdong nung shia lir.

Iba loan agir küm ka junger menokba mapang aluyimer nem tetemlok shilem asem ya sorkari menoktsütsü.

Iba loan aluyimertemi lakh 3 junga agir mapang shidak nung

menokra parnok dang tetemlok kicha magütsü.

Iba sangdong ajanga ashiba agi, mapang tatakzük agüja aliba nung sen apuba indang tetemlok ya NABARD ajanga menoktsütsü.

Iba scheme kübok KCC mesüra crop production loan ya commercial bank, Arunachal Pradesh Rural Bank (APRB) aser Arunachal Pradesh State Cooperative Apex Bank (APSCAB) Limited tem nungi RBI aser NABARD-i agütsüba tetuyuba nung ajemdaker teyari ya agitettsü.

Tang financial year mapang CMKRY scheme kübok crop loan ya aluyimer 7,500 nem agütsütsü asoshi Chief Minister, Pema Khandu nükjidong lir. Iba sentong asoshi circle officer tem ya financial extension officer ama mapa inyaka bank nem mapang shidak nung sen apua aliba monokba nung yarütsü.

Myanmar nungi nisung 280 dak tali Mizoram nung arua lir



Aizwal, May 22 (Agencies): Myanmar nung aliba Arakan tesem nungi tetsür aser tanur tem timba süa nisung 280-shi Mizoram nung Siaha district kübok yimtsüing ana nung jenoka lir, ta police lenir kati Hombarnü ashi.

Nisung 200 dak tali Lungpuk yimtsüing nung jenoka lir aser nisung 77 Khalkhy yimtsüing nung lir, ta ketdangsertemi osangbener dang ashi. Arrtsü anasa aliba Assam Rifle aser district ketdangsertemi parnok nem nüngdakba teyari agütsü aser iba yim ana nung aliba nüburtemi chiyongtsü aser parnok anisüngzüktsü tesemtem anepalutsü, ta ketdangsertemi sa ashi.

Lungpuk yimtsüingi Siaha district Superintendent of Police

oa tongogo aser parnok kümzüka alütsü asoshi nüngdakba maparen inyakogo, ta ketdangser osang ajangasa ashi.

Arakan Army (AA) telungpur aser Myanmar mitkartem tsüngda kobi melie rara adoktsü tensa ka nung lir ta osang angashiba ajanga Ralie yimtsüing nung alirtem Myanmar doktsür ajen, ta osang ajanga ashi.

Assam Rifle ketdangsertemi Myanmar mitkar ketdangsertem dang iba osang sangoktsüogo aser Myanmar nung tesem balala nung jenshia aliba nüburtem kümzüka ayütsü asoshi Assam Rifle ketdangsertemi temepeshiba osang agütsüogo, ta kasa osang ajanga ashi.

Meghalaya Chief Secy Kropha küm 2 tepoukdak ayütsü



Shillong, May 22 (Agencies): Taoba coal secretary, H C Gupta tanü nakmati atuba nung ochi mashi ken o dak sendakba nung küm ana tepoukdaki yoktsü asoshi special court ka

ajanga tetuyuba agütsüogo.

CBI obendanger Bharat Parasher-i kasa ken o nung sorkar ketdangser, K S Kropha aser K C Samaria na küm ana tepoukdak ayütsü asoshi tetuyuba agütsüogo.

Tepouk dak ayütsü asoshi tetuyuba agütsüba den külemi parnok asem dang senchi lakh kaka achi.

Parnok dak alaka okadak ajanga Kamal Sponge Steel & Power Ltd company dang senchi crore ka achi aser Managing Director Pawan Kumar Ahluwalia küm asem tepoukdak ayütsü aoshi okadak

ajanga tetuyuba agütsü. Maneni Ahluwalia dang senchi sen lakh 30 achi.

Highi court nung keno benoktsü asoshi maongka agütsütsü mechi nung aibelena alirtem ajak nem tepoukdak ayütsü asoshi tetuyuba agütsüba sangdongli bail agüja liasü

Gupta aser ketdangser ana taoba mapang Madhya Pradesh nung Thesgora-B Rudrapuri coal block nija company ka nem agütsüba dak sendakba nung inyakyim nung aibelena aliba ajanga okadak aija liasü.



Guwahati, May 22 : Hombarnü Guwahati kübok Khanapara nung Mini ISBT lapoktsüba sentong nung Assam Chief Minioster Sarbananda Sanowal temo milen tsüloktsüba noksa nung angur.

AKRSU puri Assam ajunga ghonda 36 mokdangtsü

Guwahati, May 22 (Agencies): Kamatapur state tasen ka kümtettsü asoshi akhangba dak sendakba nung state sorkari temolung magütsüba ajanga All Assam Koch Rabongshi Students Union (AKRSU) ajanga Brehostibarnü (May 25) ghonda 36 Assam ajunga mokdangtsü asoshi ayonzükoggo.

Iba osang ya Bongaigaon

nung Deobarnü parnok office nung osangbenertem den jembidang ARSU-i sangdong.

Kasa mapang nung PM Narendra Modi-i Changsari nung AIIMS lapoktsüba atema nüngshilong azüngba sentong agitsü aliba anema Raha nung May 25 nü national highway mokdangtsü. Iba lenmang mokdangba sentong ya May 24 nü akatsüba liasü.



TIR YIMYIM

YIMOBILEM (EDITORIAL)

DIMAPUR TUESDAY, MAY 23, 2017

Yimtaki maotsüba osang

Election mapang Dimapur nung alir Aotsür Aortem dang pei tsürabur yimtaki maotsü asoshi Dimapur nung tenteta aliba Aor telongjem tentet aseme metetdaksüba osangji mapang shitak ka nung telemtetba osang shitak ka metetdaksüogo. Dimapur nung kiyong ajak nung Aotsür Aortem nütsünga teimba amai lir. Ajisüaka, electoral roll reprangdangra Aotsür Aor nütsüng apibo constituency ajak nung Aor voters ishishi dang angutsü. Ibaji asenoki temulung magütsüba ajanga lir. Atangji, Dimapur nung alir Aotsür Aortem Dimapur electoral roll nung tenüng ayutsü memerangbaji Mokokchung district kübok pei pei yimtsüng aser town-tem electoral roll nung pei tenüng enokdakja aliba agi asütsüa akok mesüra lokti tentet aser political party nung Aor lenirtemi tangatetba tajung agüja majungshiba agi asütsüa akok. Aji oda, talibo sensosa Dimapur nung alir saka vote-bo pei tsüraburtem yimtak dang lir ta asüba nungji takoksa ana angur. Kaji, pei telidak lima Dimapur nung yimsüsür shimtsübo tangar nem nungloka toktsür, anungji asenok asoshi tangari shimer, anungji pei alidak yimten nung temeten tuluka mali akümer. Tanabuba nung, bendanglen alirtem aoba ajanga yimertem rongnung meputep tali adokdaksür, senotsü endoker aser election temer külen yimtaklirtemi election agiba tajangzük magitetter. Atangji, alima meimchir yimya asünungji bendanglen alirtemi mounüyonga mesüra yimtak electoral nung meinoknüyonga yimtaklirtemi pei yimtsüng nung voter aika sünüba agi bendanglen alir ajak yimtak telidak nisung amai kümer electoral roll nung enoker. Ano, nütsüng yongsük züngdangba (census) mapanga pei yimtsüng nung nütsüng aika sayunüba agi yim aika nung bendanglen alirtem ajak yimtak alir ama tenüng zülüokdaksür. Ano, asenok ajak tai menaba mapa ka lir, ibaji assembly constituency delimitation mapang constituency majemdaksütsü asoshi tangalen alir aser malir ajak yimtak voter kümdaksür. Item ajakji pei yimtsüng meimba ajanga tai süaka inyakogo. Ajisüaka, ochimashi mapa meinyakyonga ochi mapatem inyaka pei yimtsüng meimtsü aser yaritsü maparen aika lir. Aji oda, tanübo ochimashi mapa inyaknüyonga technology maparentem tapu balala ajanga meinyaktetsüsa nokdangba putu ka nung alir asünungji, ochimeshinüyonga ochishia alitsüsa adoker. Tanü putu nung alirtem asoshi tia tajungtibaji aji asütsü. Aji oda, tanübo kong lidir liaka asen lima ta ser aliba putu asünungji, joko Mokokchung district kübok pei tsürabur yim nungi pilaa alibajia bendanglen masü saka pei lima aser pei yim kümer alitsüla. Tanü aliba Ao lima Mokokchung district-bo atong saka tongtibang yimten telemtetba agitsü anogo aru shia Chungliyimti-isa ora koda asütsü. Iba amaji tanü asenok Mokokchung district nungi Dimapur lima atongbajia Ao lima tasen yateta kümyonga aoba den kasa lir ta bilema pei pei alidak election mapang vote shitak enoktsütsü ashi, shinga tangar nem mesüzükdakja mesenzütsüla. Aji oda, ano Dimapur nung akok tashi pei tangatetba yari shilem agitsü ashi, yimten nung telemtetba agitsü mapang arudang, Dimapur lima ya asenok asoshibo bendang lima ama toktsür mesenshütsüla. Yimten nung election ya senso ka asoshi tongtibangtiba lir, iba yagi nübortem asoshi inyaktsü sentong yanglua inyaktsü atema yuisüsürtem shimtsü. Asenokbo injang prangpong amshia tashiyim agi dang election agia arunungji asenoki vote ka jenjangji apua apua bilemer. Ajisüaka, asen vote agi alima tzü mopong anishitsü aser vote agidang alima melenshütsü. Aji oda, senso shiai pei meyong vote tejangja enoktsüba ajanga yimsüsür tajung shimtsü anungji government tajung asütsü. Item jenjangtemji angateta, Dimapur nung alir Aotsür Aortem pei tenüng kanga nendaka electoral roll nung zülüoktsüla aser election mapang kechisüdir süaka Dimapur ya pei lima asünungji, pei lima toktsür maotsüla.

OLEMSABANG

Nüjiso bushiba mapa Nokdensang-er ita amai kümadokogo.

-L.Kika Pongener, Aoyimkum, Dimapur.

(Yashi adok nungi...)

Anungji asenok nükjidongji mesümesüa masü, saka sademsademer mangdang tulu asütsüla, aser asen tsüraburtem shirnoki mezüng iba linük tenzükba mapa ya kechi nükjidong yur tenzük, iba nükjidong nungji rangloker masetshii alizüng atongtsü arishia inyaktsüla. Ano linük tenzüker aser nütsüng nübur ajaki kanga süoki ia rajema angatetsüba tongtipang kaji, nüjiso dak sendakba mapa nung kechi telemtetba agidir agiaka, ajungaji Naga nunger kin ajak ajungtsü asoshi telemtetba agir asünungji, India sorkar tang kechisa takangba agutsür, mesüra parnok den kechisa telemtetba agir, item ajungaji nütsüng nübor nema jangjangjaa rajema angatetdaksütsüla, aser nütsüng nübur nungia shisatsü agia asen Naga nunger kin ajaki mulonga agizüktetsüsa telemtetba ka agitsü nükjidong asütsüla. Aji oda, nükjidongbo tajung sernung, nütsüng nübur ajungai jungjunga rajema mangajemi mesüra jungjunga mejangjai tatempang telemtetba ka agiadoker, iba nungji rongtsüng memedemtettsüsa süra takoksa ulura ka asütsü. Anungji kanga shisa ka-a kinük ajungalen kanga junga shisadanga bilemdanger külenang tatempang telemtetba ka agitsü nükjidong asütsüla. Tongtipangsa asen Naga nunger nütsüng nuburtema kin o kin tsüngda telemsa melii ka küma longjemtsüla, asen atepzüng nung melongjemi lemsaa yur kodaser asenok nüjiso angutsü. Ano aji tang masü, linük tenzükertem o nütsüng nübur tsüngda nung telongjem temeimtep akatsü kangasa tongtipang lir. Asenoki India sorkar nungi nüjiso bushir, ajisüaka asen atepzüng nung asenok tsüngda nungbo nüjiso maka, nüburtem ka o ka tsüngda nung tesendaktepraksar, kati ka tsübutepa lira, mesüra kati ka amokmerentepa lira, India sorkar nungi nüjiso anguyongjia asen atepzüng nungbo nüjiso makatsü, aser asen atepzüng nung nüjiso makara, tang tensa tia tang nungi tarutsü aliba tensa tiaji ashiko kanga agi tamajungba asütsü kecha meteta maka. Aser asenok nübur tsüngda nung tang amaisa telongjem melira, nüjiso melena meyiper asen Naga nunger kin o kin tsüngda nung telemsa adoka raraang tenzüktsü amai nükla nung angur. Anungji iba ama tensa tiaji majurutsü atema tamasa asen atepzüng nung asen o asen na tsüngda nung nüjiso akatsü lenmang bushitsüla. Otsüla oboula nungeri shin o jembia aruba otsü ka, mapang ka nung Shitsü (Monkey) ana amtsük ka agi raktep aser tena sasa mebendangteti shirong ka dangi ao, aser shirongla jagi amtsükji ana küma shidangtsü, saka tip külen tulu aser tip külen tilaka ta sadangtsü, anungji tena rongnung ka temulong masü, ajioda tenaprongla peladaktsütsü meji amtsük tilabaji Shirongla jagi chiadok aser tanüngba jagi ana küma sadangtsü, ajisüaka mezüng amato tip külen tilaba aser tip külen tuluba ta sadangtet, anungji tanabena tilabaji shirongla jagisa chiadok, ta amtsük ajungaji Shirongla bangi ai. Tena kati ka den hai-haura makatet melongjemtet, aser kati ka den maremzüktepba ajanga Shirong tekülak sangjiang jonglongdaksü. Mekümdangra aser temulong medangra asen Naga nungera Shitsü ana tia jagi aitsü ana nung dang lir. Tang aliba asen Nagaland litsü yaa kangasa ilara aser nütsüng nübo agia tangar memenep alinung, ano iba yagi ana-asek küma lemsa nunga koda asütsü ? Aji oda, tang koda ka küma putepa longjema lir yamaji anüdoklen anülulen ta kecha telemsa makai külemi longjemer nokdaksüla. Anungji asenok tsüngda nung taku-tasen ajak indoker, tesüiba mapang tashimait inyakbatem kar danga lira ajak tesülen toktsür, kati ka nem tai-tadok agütsüteper, tang kechi koma ka küma langteper ali, iba ya meraksai külemi longjemer nokdaksüla. Asen Naga nunger kin o kin tsüngda nung tang amaisa melongjemi lira, nüjisoji anguyongjia asen lima sünepa yimchiyimjung nung malitsü, aser asenok tang amaisa melongjemra ashiko asen Naga nunger nüjiso angutsüba mapa ya "Nokdensanger ita" amaji tatonger amai tatonger amai anünglak talangi tua adoktsü.

Anungji arung tamasa asen atepzüng nung asen o asen na tsüngda nung, kin o kin tsüngda nung nüjiso akatsü lenmang bushidi, kati ka nem tai tatok agütsüdi, tesülen meyipa mereprangi tarutsü nükla nung ranglokdi, nükjidong tajung yudi, aser teka amtepa longjemdi. Taidok agütsütepba ya tamangba nung kotaki aotsü atema tanela tekümtet angutsü asoshi dang masü, saka yimten yimli talenba süngra nungi nüji angutsü asoshia kangasa tongtipang lir, Anungji taidok agütsüteper, ano tang nungi tali longjemshir apusodi, ta iba ocet ajanga tazüngertem den lemsateper. Kar temulong yirutsüsa tashimait metokmeperi kar danga zülusema lira metongshia azüngtsü ayongzüker.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Rongpangmen Baptist Arogo nung Father School agi



Dimapur, May 22 (TYO): Ao Baptist Arogo Padumpukhuri nung Mission Board-i teyari agüja Rongpangmen Baptist Arogo nung Father School ka ayongzüka agi.

Iba sentong ya "Lord I am a Father" omen nung ajemdaker agi aser shisalen sayurtemji-Tiayanger Lkr, Pastor, Yapang Mollier, Mission

Board Secretary, Chuba, Associate Pastor Youth aser Lima, Deacon nungertem liasü.

Father School nung tebur 40 tashi aden aser shisalen sayurtem parnok dang, tanü putu nung Khristan kibong ka talitsüyim, kinungbo tajung aser Tsüngrem tsübuba tebu ka indang t e i n y a k t s ü t e m metetdaksü.

Rongpangmen Arogo-i Ao Baptist Arogo Padumpukhuri dang kanga pelar aser maneni Rongpangmen Baptist Arogo Woman Ministry nung Associate Pastor Woman, Miss. Roseline Mollier-i anir sentong ayonger danga pelaba shisemer, ta RBA Sannüker, K. Meren Jamir-i sangdong ka nung metetdaksü.

India nung tenlaki den sannüker ki rongdoktsü



New York, May 22 (Agencies): India nung Hindu nungtem maba jenjang nung alir kar Khristan yimsü agizükba sülen Hindu nationalist temi tenlaki aser sannüker kitem rongdoktsü

Iba tatalokba ya Tamil Nadu kübok Cuddalore district nung atalok. Pastor John Muller aser pa kinungtsü na shishidaki orr meyipa arudang, tenlaki aser tena aliba ki rongdoktsür liasü, ta Morning Star News ajanga metetdaksü.

"Tawa tu Hindu nung Vanniyar telok nungi nisung kar Khrista agizük. Iba kasa telok yagi yimtsüng nung tamangba yimsü

melenba anema nokdaker, kechiyong parnoki Khristan yimsüji teküpok jenjang nung aliba teloktem indang tamangba yimsü ta bolemer. Parnoki Vanniyar telok nungi shinga Khristan yimsü magizükdaksünür," ta Pastor Muller-i ashi.

Anogo asem tejaklen nisung pungui Muller amokmerena liasü. Parnoki pa dang, "Nayang teli, iba tesem toktsür oa mesüra onoki na tatem kümtsütsü" ta ashi.

Iba arogo nung kibong 40 shi züngsema lir aser iba tatalokba atema police-i nisung shinga mapu lir.

"Onok ajak samaogo. Kübutsü hopta 26 mashisa lir. Küna tanur

mezüngbuba asotsü imlar. Küna talidak mali. tamanger kati par kidang küna anisüngzükdaksür" ta sannüker ashi.

Iba lendong ya May 3 nü atalok. India nung media temi Khristantem dak atalokba osangtem kangabo mesangdonger. Lendong tululu atalokbatem dak alaka tilateri atalokbatembo parnoki madoktsür.

Tawa tu All India Christian Council-i bushitetba osang ka nung, India nung Khristantem anema mapa inyakba kanga bulua ataloker ta metetdaksüogo. Hindu nationalist Bharatiya Janata Party züngsemtemi "Hindu linük" ka kümdaktsütsü atema inyakdang nübo agi tangar memenepba teloktem anema parnoki inyaksangshir.

2016 nung Khristantem amakba inyakyim noklang nung shilem 20 talila liasü aser Khristantem dak teka sangshibaji shilem 40 teimba atalok.

"Ghonda 40 shia Khristantem anema mapa inyaker. Taoba mapangbo state kar nungdang atalok saka tangbo state 23 tashi nung ataloker" ta AICC-i metetdaksü.

ANOGO ABEN TSÜNGREM DEN

PEL TAKÜM ASOSHI NÜKJIDONG

"Saka nü dang kü tashi sayutsü aser kü tenüng alima ajaklen sangoktsütsü asoshi nükjidong yur ni na taküm yutsüogo" - Anitet 9: 16

Asenok ajaki asen taküm ka indang ya asüngdang, aser shisadanger. Aser aikati pei sasa asüngdang, Ni ya shiba? Ni ya kechiba iba limai aru? Asenoki taküm ka indang telangzübaji bushiteper. Temeim adianutem, alima nung taküm ka telangzüba ya kecha nunga mangutsü saka asen taküm nem nükjidong agütsüsang, Tsüngremi dang asen taküm tetezüji agütsütetsü aser telangzübaji angutsü.

Tsüngremi asenok ajak nem pei nükjidong, iba alima nung ochi shia inyaksü agüja lir. Pei taküm nung pei nükjidongji tongtibang! Pei taküm ka nung takok anguba aser nü taküm nung nai nu nükjidong angubaji kasa masü, asenok taküm nung takok tulu ngua alitsü akok saka nai nü nükjidongji memetetra asenokji tebilemtsü lir.

Nükjidong ta süra asenoki asen taküm nung Tsüngremi agütsüba sempetji bushiteta iba sempetji shitak amshia inyaktetba takümji lir. Tsüngremi asenok nem nungloktsüba mapa jaki asen taküm, kibong, lokti ajak aseni inyakba nungji pelateptsüla. Asenok ajaki, tanü Tsüngremi agütsüba nükjidongji bushiteta, aser ochi agi inyakteta sayur asü masü?

SARASADEM:
Nü nükjidong nung jajatsü Nai onok den jemi aser sayu nung pelar. Amen



Mangmetong Baptist Arogo nung Associate Pastor women R Sangyula Imchen Ao Baptist Arogo Mungdang ajanga May 21, 2017 anogo akümüli tepiyong Tsüngremer wadang nung nokdaksü ordain asüba osang sangdonger. Anungji iba sangdong ajanga la dang Reverend R Sangyula Imchen ta ajatsu metetdaksür ta ABAM ordination Council tenüng nung Rev C Wati Longchar, Chairman, Ordination Council-i ashi.


Billboard Music Awards nung Khristan kentenertem sempet aika angu

Las Vegas, May 22 (Agencies): Deobar aonung Las Vegas nung Billboard Music Awards nung Kirk Franklin-i anir K h r i s t a n kentenertemi takok nguogo.

Kirk Franklin-i Jekalyn Carr den külemi Top Gospel Artist sempet angu. Iba telemsa nung Travis Greene, Tamela Mann aser Hezekiah Walker nungertem dena liasü.

Texas nungi arishi küm47 Kirk-i Grammy Awards 12 den külemi tanga sempet aika agizüka lir.

Billboard Music Awards nung Top Christian Artist ji "Come Alive (Dry Bones)" kentener Lauren Daigle-i angu. Iba telemsa nung la den Hillsong Worship, Hillary Scott and the Family, Skillset aser Chris Tomlin nungertem liasü.



Ajak rongnung sempet teimba angurji rapper Drake liasü. Pai ajak agi sempet 13 agizük aser iba ajanga lai taokba takok teimba angur Adela ajatetogo. Adele-i Billboard Music Awards 12 tashi nguteta liasü.

Canada nunger arishi küm 30 tain Drake-i Top Male Artist aser Top Billboard 200 Album sempettem dena angu.

OLONG PAITEP # 4429

1		2					3		4	
					5		6			
7			8							
							9			
										10
	11				12					
					13			14		
15										
			16							

TIPIEN

- 2. Yisu metadak - (6)
- 6. Zübu aket - (4)
- 7. Chi o aon aleper abenba - (6)
- 9. Te_ _ _ tet - (3)
- 11. Tebang nungi adokba - (3)
- 13. Temedanger / Tamentep - (6)
- 15. _ _ _ _ kum - (4)
- 16. Medemdanga jembi - (6)

LANGTSÜNGLEN

- 1. Aria bilemba / Yimlibilem - (6)
- 2. Ki tesadem / Ki tulu - (4)
- 3. Tai inyak - (8)
- 4. Jashiseta bilem / Mepelatet - (5)
- 5. Le _ _ _ ng - (3)
- 8. Aibelentsü mali - (8)
- 10. Ang tila / Angjang - (6)
- 11. Pei tasola - (5)
- 12. T _ _ _ r - (3)
- 14. Idakji or - (4)

OLONG PAITEP # 4428 TELANGZÜBA


TIPIEN :

- 2. Tatitang, 6. Angazük, 9. Aket,
- 11. Teimsür, 13. Rata, 14. Mepishi,
- 17. Pungmang.

LANGTSÜNGLEN :

- 1. Mozü, 3. Taret, 4. Ain, 5. Tenem,
- 7. Aser, 8. Tarak, 10. Teti, 12. Ramia,
- 15. Ents, 16. Hon.

Noksa nung meputepi aliba tesem 15 bushiang



TANÜBO NAI LANGZÜANG

- Q. Koba teloki 2015 Indira Gandhi Peace Prize angu?
- [A] United Nations High Commissioner for Refugees (UNHCR)
 - [B] Indian Space Research Organisation (ISRO)
 - [C] International Court of Justice (ICJ)
 - [D] International Labour Organization (ILO)

(Taruba adok nung onoki langzüsü)

YASHIADOK TELANGZÜBA : Prashant Ranganathan

Happy Birthday

TENÜNG : Temsülong Jamir (Wameken)
 Tasoba : May 23
 Küm : 4
 Talidak : Signal Colony, Dimapur.
 Jabaso Alongba küm 4 tashi Tsüngremer taochi aser temoatsü nung anir aruba asoshi Pa tenüng tali asanger. Maneni arishi talang den taküm temjena moajang ta sarasademtsür.



"Happy Birthday Along"
 -Oja, Oba, Oya Washi, Otsü-Obou, Azü & Kinüngertem.

NAIA YA METETER MA

CANDY CRUSH ASAYA



Candy Crush Saga

- * Candy Crush Saga asaya ya 2012 küm April ita nung Facebook nung sayaba sülen 2012 November ita nung smartphones nunga sayaa liasü.
- * Candy Crush ya Facebook app mezüngbuba jenjang nung lir.
- * Facebook nung iba games asayar nisung million 6.7 shi lir, aser item rongnung jagi shilem 69 bo tetsürtem lir.
- * Candy Crush app ajanga anogoshia US sen 633,000 aazüker.
- * Hongkong nungbo nisung tenet shia nungi nisung katibosa Candy Crush asayar.

SUDOKU # 3541

1			6	4	5			
9	2		5			3	1	
	4	8						
7			9	1				
		8		9				
		2	5			7		
6	5			9	3	1	8	
3			1	5		4	7	4
		4			6	2	9	

TELANGZÜBA # 3540

4	9	7	8	2	5	6	3	1
1	6	2	9	7	3	8	4	5
8	5	3	6	1	4	7	2	9
2	7	1	4	5	6	9	8	3
6	8	4	2	3	9	1	5	7
7	5	3	9	1	8	7	2	6
3	2	5	7	6	1	4	9	8
7	4	6	5	9	8	3	1	2
9	1	8	3	4	2	5	7	6

OJANG LUTEP # 4034

- SENA : □□□□
- MALI : □□□□
- GNNU : □□□□
- GIAR : □□□□
- ELANNMG : □□□□□□□
- KMUNGAAEJ : □□□□□□□□
- IBAROG : □□□□□□
- ANGJUT : □□□□□□
- AAIK : □□□□
- RLI : □□□

OJANG LUTEP TELANGZÜBA # 4033

YI JEMER KIBONGTEM ASER CHIDIYUNGDIR
 KIBONGTEMI TANGAR KIBONG KODANGA MEMENEPTSÜ

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü na tera tezüdanga alitsü. Wakong sentsü süoshi asema ajanga nü tia ajungtsü. Nikongdang 2 nungi 3 ako mapangji na asoshi tajungtiba asütsü.



Taurus
20/4-20/5

Tanü nü shisatsü junga alitsü, anungji nai tarutsü asoshi sentong yanglutsü merangang. Nikongdang 2:15 nungi 3:50 ako tsüngda mapangji na asoshi tajung asütsü.



Gemini
21/5-20/6

Tanü nai ner medemertem den rarabangsen madoktsü merangang, aji oda mesüra na koda masüba tensa kati aitsü. Nikongdang 5 nungi 6:15 ako mapangji na asoshi tajungtiba asütsü.



Cancer
21/6-22/7

Kidang-kibong nung mangatettep tera alitsü. Nai iba kuliji bushia tajungtiba agi bentettsü merangang. Nikongdang 6 nungi 9 ako mapangji na asoshi tajungtiba asütsü.



Leo
23/7-22/8

Tanü nai nü ain-apong azüoktsü merangang. Tanü anogobo nai aremzükbajisa tajungba asütsü. Nü den anasa alibapurtem den tesendaktep junga yanglutsü merangang. Nikongdang 6 nungi 7:15 ako mapangji na asoshi tajungtiba asütsü.



Virgo
23/8-22/9

Nai meranga inyaka aliba mapatem ajanga nü nem süngjang junga tangtsütsü. Tetushiji nü meyong asütsü. Nai meranga inyaka nung Tsüngremi na moatsüogo ta nai züngshiang. Nikongdang 6 nungi 7 ako mapangji na asoshi tajungtiba asütsü.



Libra
23/9-22/10

Tanü anogo nai tangar tebilemba metettsü merangang. Nai akokba shisa yari agi nai tangar yariang. Süoshi tanak asema ajanga na ajangzüksü. Tanü 11 ako nungi 1 ako mapangji na asoshi tajung asütsü.



Scorpio
23/10-21/11

Nü tebilemstütem koktetsüsa tanü anogo nü dak nai temolung lema bilemstü. Iba temolungtetba ajangaji nü molungjang nung tesünep aser tepela alitsü. Nikongdang 5 nungi 7 ako mapangji na asoshi tajungtiba asütsü.



Sagittarius
22/11-21/12

Tanü anogo nai nü mapa nung tangar teyari nungdaksü, anungji kar teyari meshiang. Nikongdang 4.35 ako nungi 5.45 ako tsüngda nai tongtipang osang kar angashitsü.



Capricorn
22/12-19/1

Tanü na tera azü-mesena alitsü, na züba-zülema lira nai maongka kar magitettsü. Nü nükjidong nung rangloker inyaksü merangang. Nikongdang 2 nungi 3 ako mapangji na asoshi tajungtiba asütsü.



Aquarius
20/1-18/2

Tanü na pelaa alitsü. Taoba mapang samaa aliba oset kar nai tanü angutsüa akok. Nikongdang 1 nungi 3 ako tsüngda tongtipang mapa inyaksü merangang.



Pisces
19/2-20/3

Tanü nai mapang talang ka majurui aliba nisung kar ajurutsü. Nikongdang 6 nungi 8 ako mapangji na asoshi tajungtiba asütsü. Medemertem den amongba ajanga nai tepela angutsü.

Pak TV actor Shahid Naseeb lenmang nung mejanger



Islamabad, May 22 (Agencies):

Pakistani actor, Shahid Naseeb ya television serial aika nung shilem agia liasü saka tangbo pa poksung aatsü asoshi painter mapa inyaka senzür ka kumogo.

"Ni anong nung khen dang chiyonger. Lahore nung ni talidak ki mali anungji lenmang nung dang mejanger. Kü budget kanga dang ajema aliba ajanga ki ka taa agüja alitsü asoshi makoker," ta Naseeb-i ashi.

Film aser serial balala nung shilem agitsü asoshi maongka manguba ajanga Naseeb tekubokba jenjangi lua painter ka aküm. Pai serial; Dullari, Jab Usse Mujh Se

Mohabbat Hui aser Iltaja amala nung shilem agia liasü.

"Kü asoshi mapang kanga tamajung ka lir saka Lollywood aser Bollywood nung ni ama yamala timtem ajurur jenjang tajung ngutetba pur aika lir." ta Naseeb-i ashiba osang ka ajanga metetdaksü.

Naseeb shiba tang ita nung 20,000 aaser pa music industry nung maongka tasen bushiba mapang lir. "Ni kü ken ka sayatsü asoshi sen bendena ayutsü asoshi merangdar. Ni Lahore nung musician kar ajuruogo aser parnoki ni yaritsü asoshi sen 100,000 meshir, anungji kü nükjidongji iba ya bendentsü asoshi lir," ta pai ashi.

"Ni yimdaki meyipa motettsü kechiyong ni tamakok anguba atema ajaki menütsütsü. Kü den külemi inyakertemia kü dang 'Shahid Rungwala' amala jaa ni mesushir aser iba ajanga ni kanga jashir," ta paisa ashi.

Pai ashiba agi, pai 2016 action-thriller, Whistle script ajak zülu saka iba asoshi pa nem tenüngsang tim magütsü. "Whistle ya ni asoshi maongka tajungka ta iba mapang nung ni bilem. Iba ajanga ni asoshi lenmang aika lapoktsütsü ta bilem saka ni tai liasü. Tanbo ni kü poksungtsü asoshi memetetba kidang rong teba senzür," ta pai maneni shisem.

Pierce Brosnan-i James Bond agi alak



London, May 22 (Agencies): James Bond shilem agiba ajanga alak, ta Pierce Brosnan-i ashi.

Arishi küm 64 tain, actor Pierce Brosnan-i British Secret Service Spy ama 007 movie pezü nung 1995 küm nungi 2002 küm tashi shilem agi.

Pierce Brosnan-i James Bond ama shilem agiba movie ya 'GoldenEye', 'Tomorrow Never Dies', 'The World Is Not Enough' aser 'Die Another Day' nung ya lir aser iba sülen 2006 küm 'Casino Royale' nungi tenzüka Daniel Craig-i melenzük.

Ajistiaka, iba movie yangluba yimya ya melenshitsüla, ta Pierce Brosnan-i ashi.

"Alima nung tang atalokba

aser iba movie bilemdangand ni tera tezü danga aküm... Bond ya tera tesashiba aser shidakba amai yangludaktsünü, saka iba movie indang script azüngdang kasa dang liasü," ta Brosnan-i osangbener dang ashi.

"Anungji nai iba script nung aliba sülen aotsü kasa yimya nung alima sema jajatsü," ta pai shisem.

2002 küm 'Die Another Day' indang script azüngdang iba movie indang shilem karbo kanga temenütsüka liasü, saka iba script nung aliba ama aotsüsa aküm, ta pai temulung nung bilemba olen ka odia lemsatep.

"Die Another Day yangluba mapang ni jangratema shilem agi. Iba script nung shilem karbo

temenütsüka liasü, 'invisible car' shilem tu junger, saka ni shitak amai shilem agia ao," ta Brosnan-i ashi.

"Tamang makatsü nung nai tali belema tekolak ngua inyaksüji tasak lir," ta 'Die Another Day' nung tongti shilem agisangisa ashi.

Brosnan-i 1995 küm Bond indang film, 'Golden Eye' nung shilem agidang iba franchise ya küm trok tashi mapa junga meinyaki liasü, aser Sean Connery aser Sir Roger Moore-na nükjidong tongdaksütsü asohi pa temolung moluteti bilem.

"Saka ni kü indang 'rhythm' nung mapang shidak amshia iba movie nung shilem takok ngua agia ao," ta Brosnan-isa shisem.

TAN HOPTA ATEMA - KOMA SÜLA ?

Q Nagaland nung senzüba taxi aser auto rickshaw ajak ya Naga nungertemi dang anitsüla ta ozüng kuma latet nunga koma süla?

Olong 20 shi nung May 26, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzubatemi taruba Hokolbar nü adoktsütsü.

Konkan Railway station 28 nung Wi-Fi angati agütsütsü

May 22, 2017 (Agencies): India sorkar indang 'Digital India' sentong den putepa Railway Ministry ajanga Maharashtra kübok Konkan railway station 28 nung Wi-Fi angati agütsütsü asoshi Deobarnü amenokogo.

Angati Wi-Fi facility agütsütsüba sentong mezüngbuba shilem nung Kolad nungi Madure tashi station 28 nung agütsütsü, ta Deobarnü ketdangser kati ashi.

Ministry ajanga ashiba agi, iba facility ajanga Indian Railway nung ainlen senzür, train nung teti senzürtem aser raliwalirtem nem nungdakba osang balala ngutetba nung

yaritsü aser station nung train ataba mapang parnok mapang amajok nung meindoki tajangzük akaba mapa karbo inyaktettsü.

Iba sentong ya 'smarter India' yanglutetba nung jenjang ka lir, ta ministry ajanga shisem.

Joispot mobile application ajanga tanen maka upload sütetba den külemi second shia 2 megabits (mbps) speed wireless internet agütsütsü ta metetdaksü.

Iba sentong asoshi Indian Railway-i Internet service agütsür Syscon aser Joister den longjemogo.

Angati Wi-Fi internet ya Kolad, Mangaon, Veer,

Karanjadi, Vinhere, Diwankhavati, Khed, Anjani, Chiplun, Kamthe, Sawarda, Aravali Road, Sangameshwar, Ukshi, Bhoke aser Ratnagiri station tem nung agütsütsü.

Kasa sentong kübok angati internet agütsüba station tem rongnung Nivasar, Adavali, Vilavade, Rajapur Road, Vaibhavwadi Road, Nandgaon Road, Kankavali, Sindhudurg, Kudal, Zarap, Sawantwadi Road aser Madure densema lir.

Iba system ajanga station tulu nung internet amshir 300 nem aser station tila nung interenet amshir 100 nem ta service agütsütettsü.

Chris Cornell asüpila sentong May 26 nü akatsü



Los Angeles, May 22 (Agencies): Soundgarden nung kentener, asür Chris Cornell okatsür, Kirk Pasich-i ashiba agi, Chris tasümgang California-i bener arutsü aser May 26 nü 'private funeral' ka akatsü.

Kentener shiba taoba Brehostibarnü Detroit nung asü, pa LA nung Hollywood Forever Cemetery nung aremtsü. Hokolbarnü asüpila juri sentong ka süaka pa okatsüri ashiba agi, telemtetba agir külen 'public memorials' akatsü asoshi sangdongtsü, ta osang ka ajanga metetdaksü.

Wayne County nungi medical examiner-i tawa Cornell pa sasa aletsüta asü, ta jangjatsüogo.

Aji saka par kinungertemi Brehostibarnü ashiba agi, pa Ativan atema mozü chia liasü aser iba mozü tali achiba ajanga telemtetba junga magiteti aletseta asü südi.

"Toxicology tests osang maru tashi Chris-i pa sasa aletsüta asütsü asoshi molungtetba nung mozü tali achiba ajanga asü masüar mejangjatettsü," ta par kinungertemi ashi.

Kasa mapang nung iba hopta tsüingda kentener aikati Chris nem tetushi agütsüogo. Ryan Adams-i New Zealand nung 'Black Hole Sun' ken aten aser yamaji Metallica nungi Robert Trujillo-i pa bass solo nung kasa ken inoksema atem.

LA, Rose Bowl nung U2 pur kentenba sentong nung Bono-i parnok indang 'Running to Stand Still' ken ya Cornell aser par kinunger nem tenloksü.

2017 March tashi nung telecom subscriber billion 1.2 jungogo: TRAI

New Delhi, May 22 (Agencies): February ita tashi nung India nunger telephone subscriber million 1,188.55 liasü aser March tatem tashi nung million 1,194.58 jungogo aser ita ka nung mobile amshir nütsüng arenba ya shilem 0.51 lir, ta Telecom Regulatory Authority of India (TRAI) ajanga sangdong.

Kasa mapang jila balala nung subscription tasen asüba ya million 692.15 nungi million 692.97 akum aser

yimtsüngtem nung million 496.39 nungi million 501.61 akum.

Ita shia terenlok ya jila nung shilem 0.12 aser yimtsüng nung shilem 1.05 liasü. India ajunga nung telephone amshir nütsüng ya shilem 92.59 nungi shilem 92.98 akum.


2017 February ita tatemlen wireless amshir ya million 1,164.20 liasü aser March ita atemdang million 1,170.18 akum aser iba renlokba ya shilem 0.51 liasü.

March ita nung Mobile Number Portability (MNP) atema million 6.03 aru. 2017 küm February ita tatemlen iba MNP atema million 266.73 arua liasü aser March ita atemdang million 272.76 aru.

Wireline amshir million 24.35 nungi million 24.40 akum. Iba ajanga ita nung shilem 0.22 terenlok sayur.

Wireline amshir ya jila nung shilem 84.24 akum aser yimtsüngtem nung shilem 15.76 agi timba akum.

Moto C aser Moto C Plus smartphone sayaogo



May 22, 2017 (Agencies): Lenovo meyong Motorola ajanga Moto C aser Moto C Plus Android phone sayaogo. Moto C ya tawa Twitter nung Evan Blass-i temai adoktsü.

Moto C aser Moto C Plus ya jenjang kanga talang asüba ajanga kanga nungtugu Moto E melentsü.

Moto C aser Moto C Plus smartphone anaprong mapang talangka melie America, Europe aser Asia Pacific nung angutsü, ta company ajanga ashir.

Moto C indang 3G amshitetba smartphone nung 1GB RAM aser 8GB internal storage alitsü aser iba phone ya

sen 6,200 agi angutsü. Kasa model süaka 4G amshitetba smartphone nung 1GB RAM aser 8GB internal storage lir aser iba phone ya sen 6,999 agi angutsü imlar.

Moto C Plus jenjang sen 8,400 nungi tenzüktsü imlar aser iba smartphone nung 1GB RAM aser 16GB internal storage alitsü.

Moto C indan display ya inch 5 aser 854x480 pixel resolution alitsü. Iba phone nung MediaTek quad-core processor inoka lir aser tesülen camera ya 5MP aser tejaklen camera ya 2MP alitsü.

Moto C smartphone nung Android 7 Nougat lir aser battery tashi ya 2,350mAh. Iba smartphone ya Starry Black, Metallic Cherry, Pearl White aser Fine Gold sentsütem nung angutsü.

Maneni Moto C Plus nunga display ya inch 5 den HD resolution ya 1280x720 pixels alitsü. Iba smartphone nunga quad-core MediaTek chipset keta lir.

Moto C Plus phone nung ya Android 7 Nougat keta lir aser iba phone indang battery tashi ya 4,000mAh alitsü.

Billboard Music Awards 2017 takokertem



May 22, 2017 (Agencies): Kanga dang yongyaa aliba music award shows, Billboard Music Awards 2017 May 22 nü agiogo. Alima ajunga nung nungtugu kentener Drake-i iba sentong nung sempet timtiba ngua liasü. Pai Top Artist aser Top Billboard Album dena sempet 10 angu. Rapper-i iba sentong nung sempet ajak senteper 13 ngua liasü.

Sentong nung 'Top Male Artist' sempet agizükdang Drake-i külem nominee tem; Justin Bieber, Weeknd aser

Shawn Mendes nunger tenüng asang.

Arishi küm 71 tain kentener Cher nem Icon Award agütsü. Lai iba sentong nung küm 15 nung mezüngbuba kentenba nung shilem agia liasü.

Maneni sentong nung Imagine Dragons pur-i asür Chris Cornell nem tetushi agütsü. Iba sentong ya Ludacris aser Venessa Hudgens nati host asü aser tangar den Miley Cyrus, Drake, Lorde aser Nicki Minaj nungeri shilem agi.

2017 Billboard Music Awards takokertem yamai alitsü:

Top artist: Drake

Top new artist : Zayn Malik

Top Billboard 200 album: Drake

Top female artist: Beyonce

Top male artist: Drake

Top duo/group: Twenty-one pilots.

Top Hot 100 song: The Chainsmokers feat. Halsey, "Closer."

Top Hot 100 artist: Drake

Top collaboration: The Chainsmokers feat. Halsey, "Closer."

Top R&B artist: Beyonce

Top rap artist: Drake

Top rock artist: Twenty-one pilots

Top rock album: Metallica, Hardwired... To Self Destruct

Top Latin artist: Juan Gabriel

Top dance/electronic artist: The Chainsmokers

Top Christian artist: Lauren Daigle

Top gospel artist: Kirk Franklin

Top touring artist: Beyonce.

Top Soundtrack/Cast Album: Hamilton: An American Musical

Billboard Chart Achievement Award: Twenty One Pilots

Icon award: Cher.



Cannes, May 22 : 70buba Cannes Film Festival nung 'Happy End' film atema noksa tangokba mapang iba film Director Michael Haneke, shilem agir Jean-Louis Trintignant, Isabelle Huppert, Mathieu Kassovitz, Toby Jones, aser Franz Rogowski nungertem noksa nung angur.



May 22, 2017 nü Gandhidham (Gujarat) nung Kandla Port indang project balala tenzüksüba sentong nung Ato kilonser, Narendra Modi adenba noksa nung angur. Kasa noksa nung Road Transport & Highways and Shipping Union Minister, Nitin Gadkari, Gujarat CM, Vijay Rupani, MoS for Road Transport & Highways, Shipping & Chemicals & Fertilizers, Mansukh L Mandaviya aser MoS for Road Transport & Highways & Shipping, P Radhakrishnan nungera angur.

NPT tezüngzüktep magiba linüktem NSG nung madentsüla: China

New Delhi/Beijing, May 22 (Agencies): Taruba ita Nuclear Suppliers Group (NSG) senden amentsü lia India-i NSG züngsem akümtsü benoka aliba anema Hombarnü China-i, non-NPT linüktem iba telok nung madentsüla, iba tangatetba nungi onok masetshir, ta metetdaksü.

Osangbenertem senden ka nung Chinese Foreign Ministry otongdar, Hua Chunying-i, "NPT tezüngzüktep agia maliba linüktem NSG nung madentsüla, iba tangatetba nungi China-i masetshir," ta metetdaksü.

Taruba ita Swiss yimtiba,

Bern nung NSG senden amentsü lia, India-i iba telok nung züngsem akümtsü benokba dak sendakba nung osangbenertemi asüngdangba langzüdang lai, "2016 küm Seoul nung plenary senden alidang NSG-i bangjembaji onoki nungiter," ta ashi.

Ano külen ketdangsertem osang ka ajanga ashiba agi, India-i iba telok nung züngsem akümtsü nükjidadong nung iba telok nung züngsem linüktem ajak den tongtepa jembio.

India-i NSG züngsem akümtsü benokba sülen, China-i nungita Pakistan-ia iba telok

nung züngsemsü atema benokogo.

US, UK aser France densema linük aikati India iba telok nung züngsem akümtsü nungiter, ajisüaka China-ibo, iba telok nung züngsem akümtsü atema non-proliferation treaty (NPT) tezüngzüktep agitsüla, ta nokdaker.

Iba dak sendakba nung India aser China na tsüngda senden aiben menogo, ajisüaka China-i par linük tangatetba nungi matsüngshir.

India-i, NPT nung tashishitsü lir, ta shia iba tezüngzüktep magir.

Muslim law board-i SC nem Triple Talaq atema affidavit ka agütsü

New Delhi, May 22 (Agencies): Hombarnü All India Muslim Personal Law Board (AIMPLB)-i Supreme Court (SC) dang, kibong kümer balatsü atema triple talaq memelungsü asoshi kiyimtsü tetsürtem dang shiang ta 'qazis' nem tetuyuba ka agütsü, ta metetdaksü.

SC nem agütsüba affidavit nungji AIMPLB-i agiba agi, parnoki website, osangkakettem aser social media sabangtem ajanga 'qazis' dang kibong tasen akümtsüpur tetsürtem dang, kibong akümtsü tezüngzüktep agidang parnoki triple talaq memelungsü atema shiang ta tetuyuba ka agütsü.

"'Nikah' (kibong akümba mapang), 'Nikah' ketdangseri kibong tasen akümer kiyimsang/kiyimla dang, mangatetep adoka 'talaq' beshitsüsa kümra tebursang jagi khenyongi asemen mashitsüla, kechiyong ibaji Shariat (Islam tamangba yimsü ozüngtem) nung mapetba ta ashitsü tuyuogo," ta AIMPLB secretary, Mohammad Fazlurrahim-i agütsüba affidavit nungji shia lir.

"'Nikah' mapang nung 'Nikah' ketdangsüa agisangi kiyimsang aser kiyimla naprong dang, kinüngbui asemen balatsü mesangdongtsü atema 'Nikahnama' tezüngzüktep agitsü tuyuogo," ta affidavit

nungjisa shia lir.

Iba affidavit ji Chief Justice J S Kheha-i aniba obendanger pongui akümba bench kati asadangtsü.

May 18 nü Supreme Court-i triple talaq anema benokba temepishibatem angadanga liasü. Iba ken o anogo troknü tashi angadanga mapang Centre sorkar, AIMPLB aser All India Muslim Women Personal Law Board-a dena liasü.

Iba ken o angadanga mapang SC-i Muslim tentettem dang, koma ser 'triple talaq' ama sobaliba yimya ya tamangba yimsü den sendakteper, ta asüngdanga liasü.

NDA sorkar küm 3 nüngtem nung yimti 900 nung 'MODI fest' amungtsü

New Delhi, May 22 (Agencies): Ato kilonser, Narendra Modi lenisüba nung NDA sorkar küm asem ajungba nüngtem nung Bhartiya Janata Party (BJP)-i sentong balala aika renemdar.

Iba dak sendakba nung tanü Union Minister, Smriti Irani-i, May 26 nungi June 15 nü tashi sorkari linük tesem ajungalen 'Making of Developed India (MODI) benjung amungtsü, ta metetdaksü.

Ato kilonser, Narendra Modi-i May 16, 2017 nü Guwahati (Assam) nungi iba sentong tenzüksütsü.

Textiles Union Minister, Irani-i ashiba agi, yimti 900 nung MODI fest amungba nükjidadong ya, saskertem aser lanurtem dang Modi-i tenzüksüba scheme balala indang metetdaksütsü asoshi lir.

Union minister-isa, MODI fest dak alia sorkari linük tesem ajungalen 'Sabka Saath, Sabka Vikaas' sammelan amungtsü, aser item sentong nung scheme balala ajanga tajangzük angurtemi shilem agitsü, ta metetdaksü.

"Tajangzük angurtem jenti

lir, anungji shilem agir aika alitsü," ta laisa ashi.

Irani-isa, Jan Dhan Yojna scheme ajanga nisung crore 25 dak tema banking system nung denogo aser Mudra Yojna scheme ajanga nisung crore 7-i loan anguba den külemi PM Ujjwala Yojna scheme ajanga tetsür core ana dak temai gas connection agiogo, ta metetdaksü.

Item sentongtem nung Union Minister ajak, MP tem, Chief Minister tem aser Deputy Chief minister temi shilem agitsü aser ibaji ajanga Ato kilonser mapatongtem ajanga linük nung aliba district ajak terenlok agi atongba osang proktsü.

BJP Tir, Amit Shah-ia Kerala, Andaman & Nicobar Islands, Chhattisgarh aser Arunachal Pradesh state tem nung MODI fest nung shilem agitsü.

Iba den kasa Union Home Minister, Rajnath Singh-ia Jaipur aser Mumbai nung aser External Affairs Minister, Sushma Swaraj-ia Delhi aser Lucknow na nung shilem agitsü.



New Delhi, May 22, 2017: Hombarnü New Delhi, Manekshaw Centre nung Textiles Union Minister, Smriti Irani-i 3buba Defence - ITTA Joint Seminar & Exhibition on Technical Textiles semdangba noksa nung angur.

Tang mezüngsüa Indian Railways indang Tejas Express train senzü tenzükogo

New Delhi, May 22 (Agencies): Mapang talangka nungi yongyaa aliba high speed/air-condition aliba Tejas Express train tanü Mumbai nungi Goa tashi senzü tenzükogo; iba train nung LED TV aser tea/coffee vending machine keta lir.

Tejas Express yagi ghonda ka nung kilometer 200 tashi senzütettsü.

Railway Union Minister, Suresh Prabhu-i tanü nikongdang video conferencing ajanga Mumbai CST nungi Mumbai CST-Karmali Tejas Superfast train tenzüksü.

Iba train nungsa CCTV camera den smoke & fire

detection system, bio-vacuum toilets aser GPS-based passenger information display system keta lir.

Iba train nung facilities tasen aika lir asünungji tanga train dang nungi ticket jenjang tera tasakba asütsü.

Iba train ya Kapurthala (Punjab) nung aliba Rail Coach Factory nung yanglu aser iba ya Indian Railway nung tang mezüngbuba non-suburban train lir.

Railway budget benokdang nangzükba ama Tejas Express ya Delhi-Chandigarh aser Delhi-Lucknow sectors nunga senzütsü.



Kolkata, May 22, 2017: Hombarnü Kolkata nung aliba State Secretariat nung Left Front züngsemtemi longkak aita parnok nokdangba jara kakkoktsü merangba noksa nung angur.

Donald Trump-i Israel semdangdang Iran aitsür



Tel Aviv anasa Lod nung Ben Gurion International Airport nung U.S. President Donald Trump aser pa kinungtsü Melania Trump nati Israel Prime Minister Benjamin Netanyahu, pa kinungtsü Sara aser United States Ambassador to Israel tasen David Friedman nungertem külemi agiba noksa angur. (Lod, May 22)

Jerusalem, May 22 (Agencies):

Israeli-Palestinian yimjung atema US Tir, Donald Trump-i Hombarnü Jerusalem tongogo aser iba mapang pai Iran anema o jemb.

Donald Trump-i Tir akümba sülen tang mezüing atema bendang linüktem semdang aser pai mezüing Saudi Arabia semdangba sülen tanü Israel tongogo. Saudi Arabia nung pai Islamic lenirtem dang tali bilemloka aoertem anema raratsü ayongzükba den Iran luja jemb.

Hombar anüingdang Tel Aviv nung Trump anenzükdang, Israel Prime Minister Benjamin Netanyahu-i anir ktdangsertemi pa pela agizük.

Idak nungjagi pa helicopter ka nung mener Jerusalem-i ao aser Israel Tir, Reuven Rivlin'er kidang anenzükdang Iran anema jemb.

"Iran nem nuclear weapon

kodanga meyudaktsüsüla ta United States aser Israel nati ola ka adoktsü akok. Iran-i kiralongraba aser telungpur nem senotsü aser osettsüset agütsüba anentsüla" ta Trump-i ashi.

Trump-i Israel semdangba atema security kanga akangkanga renema lir aser police-i nübo 10,000 jungnüa mapa lezmüktsüog.

Netanyahu den ajurutepa senden mamendang, tanü Trump-i Jerusalem nung tongtipang tesem ana semdang. Iba yimti ya Muslim, Christian aser Jew nungertem atema kanga tongtipang lir.

Trump-i mezüing Holy Sepulchre semdang. Iba tesem nung Yisu kangki nung meta, arem aser shia aru ta Khristantemi amanger.

Iba sülen, pai Western Wall semdang aser iba ya Jerusalem anüolen tsütsü lir. Iba tesem ya Yihuda nungertem atema

temeshitiba tesem lir aser parnokki iba tesem nung sarasademer.

US tir teinyakdak kati Western Wall semdangbaji Donald Trump mezüing lir.

Trump-i Washington nungi mapusodang nungi Western Wall atema ashishitep onük ka adoka jembir. US ktdangser kari Western Wall ji Israel meyong asü masü'ar mashitsü ta jembiba sülen ashishitep onükji adok.

Israeli-Palestinian yimjung olemtep nung Jerusalem ya kanga dang tongtipang onük aser bentetsü tasak lir.

1967 küm Israel-i east Jerusalem aser West Bank atsünga agi saka ibaji alimai magizük.

Iba sülen Israel-i east Jerusalem par litsü kübok enok aser yimti ajungaji par yimtiba ta ashir. Külen, Palestine-ia east Jerusalem ji par tarutsü linük indang yimtiba ta ashir.

Thailand mozüki ka nung bomb apok; 24 yiru

Bangkok, May 22 (Agencies):

Hombarnü Bangkok military hospital ka nung bomb ka apokdang nisung 20 tashi yiru, ta police-i metetdaksü.

May 22, 2014 nü sorkar atsüngdokba sülen nungi Thailand nung telemsa adoka lir saka linük nung sorkar anemertemji mitkar tashi ajanga aziüoka arur.

Tanü bomb pokdaktsübaji shirnoki inyak'ar ano mejangjateti lir saka Thailand nung mapang talangka tejaklen nungi yimtenren telok aser telungpur teloktemi bomb tilala pokdakja arur.

Tanü Bangkok nung aliba mitkar mozüki ka nung bomb ji pharmacy ka nung apok.

"Bomb apokdang nisung 20 den tema yiruogo ta osang

angazüker" ta Deputy National Police Chief General Srivara R a n g s i b r a h m a n a k u l - i osangbener dang ashi.

"Bomb ji alepbanger bener arua yutsü ama ajiteter. Iba tesem nung battery aser wire tem liasü" ta Srivara-isa shisem.

Bangkok nung aliba King Mongkut Hospital nung Thailand armed forces nungi anisüingzükertem anepalur.



Turkey kübok Ankara nung sepaitemi taoba Turkish Air Force commander Akin Ozturk okadaki anir arudang agiba noksa angur. Yaküm July ita Turkey sorkar atsüngdoktsü merangba atema pa dak tai tonglokja lir. (Ankara, May 22)

Bangladesh nung Islamit ta temulung melemi bilemer 5 apu

Dhaka, May 21 (Agencies): Bangladesh nung lanur pungui Deobarnü ktdangser ket nung bendanga agütsü. Parnok ya Islamit telungpurtem ta temulung melemi bilemer.

Honibar nikongtsüsü Narsingdi district kübok tesem ka nung Islamit telungpurtem ki ka nung jenoka lir ta osang angazükba sülen Bangladesh elite counter-terror sepaitemi kiji lungbang.

Taküm April ita telungpur tesepep makdodkang police ktdangser ka dena nisung 10 asü, ta Rapid Action Battalion otongdar, Mufti Mahmud Khan-i ashi.

Ghonda 20 den tema onoki parnok lungpanger anükba sülen Narsingdi nung lanur pungui timi dang parnok sasa bendanga agütsü, ibaji onok indang alizüing liasü, ta Khan-isa ashi.

Ajisüaka, Islamit ta tai tongloktsür par pungu rongnung nisung kati Facebook nung pai aibelen kecha meinyak aser ktdangsertemi tashiyim mamshitsüla ta ayongzüka zülu. Iba ya ajanga nisungtemi police-i inyakba mapa nung ashishiteper. "Osangbener aser ozüing

amertemi angang, onok tai maket. Nenoki bushiang saka kecha mangutsü. Kima nungi onok shibanga lir. Yimlibilema onok kümzükang" ta Abuzafar Mia-i Facebook nung metetdaksü.

Yaküm July ita nungi Bangladesh nung Islamit 70 shi tepsetogo. Kiralongrartemi Dhaka nung café k amakdang nisung 22 tepsetba sülen nungi ktdangsertemi Islamit anema mapa inyaktsü tenzük.

RAB commander Lieutenant Colonel Kamrul Hasan-i ashiba agi, tai tonglokja alirtem dak tai maket ta kuli ngutetra, chiochtsü.

"Iba kidang onoki jihadi kaket aser shidipaktem ngutetogo. Onoki parnok dang asüingdangya asütsü aser parnok dak tai melira, chiochtsü" ta Hasan-i osangbener dang ashi.

Bangladesh nung küm ishika tsüingda bendangertem, secular writers, atheist activists aser tamangba yimsü nung nübo agi memenepertem tepsetogo.

Nisungtem tepsetba atema Islamic State telok aser Al Qaeda nati tenüing agia sangdongogo saka Prime Minister Sheikh Hasina-ibo ibaji magizüker, saka lai Bangladesh nung aliba teloktemi dang ozüing alema mapa inyakker ta ashir.



May 22, 2017 nü Philippines kübok Pasay City nung tawa tasen shimba Philippine Foreign Secretary Alan Peter Cayetano-i Department of Foreign Affairs headquarters nung wako salaba mapang sarsadamba noksa nung angur.

China nung Japan nung 6 apu

Tokyo, May 22 (Agencies): China nung Japan nung senso trok pua lir ta Hombarnü linük anaprong nungi ktdangsertemi metetdaksü.

Linük ana tsüingda tesentaktep mejungi küma lir aser tzüiyim atema mangatettep den putu 20 tomle Japan-i China litsü agitsü merangba onüktem atema linük ana tsüingda mapang shia ken o adoker.

2015 nungi China-i Japan nung senso pungu pua lir aser parnokji itdangitertem ta temulung melemi bilemba agi apuba lir.

Par pungu rongnung pezübo criminal courts tsüingdang anir oa ken o tem benokogo, ta Asahi Shimbun osangkaket ajanga metetdaksü.

Taküm March ita Shandong province nung 3 aser Hainan

province nung 3 apu, ta sorkar otongdar Yoshihide Suga-i osangbener senden ka nung ashi.

"Japan nungertem jagi domestic laws alema inyak ta China ktdangsertemi onok dang shiogo aser iba atema diplomatic mission temi mapa inyakdar" ta paisa ashi.

Külen, Beijing nung Chinese foreign ministry otongdar, Hua Chunying-i par trok indang ken o bushisüingdang südar aser Japanese consular ktdangsertem dang iba osang metetdaksüog.

Tang tashi nung Japan nung 11 tashi China nung pua lir, ta foreign ministry ktdangser katia ashi.

Taküm March ita apuba nisung ajakji Japanese company ktdangsertem lir aser parnokji China nung local company temi jaokba atema aoba liasü, ta Japan media ajanga metetdaksüog.

Zunheboto nung CFR training agidar

Dimapur, May 22 (TYO): May 22, 2017 nü Zunheboto Government College (ZGC) nung anogo troknü Community First Responder (CFR) tenzükogo.

Iba training ya Nagaland State Disaster Management Authority (NSDMA) den District Disaster Management Authority (DDMA), Home Guard, Civil Defense aser SDRF, Zünheboto-i yaritepa ayonga akar.

Iba training tetenzük sentong nung jembidang Zunheboto SDO (C), Vekuto Vero-i, alima tsüngsang-mopung melenshiba den külemi alima lendong balala atema renema alitsü nüngdak, ta metetdaksü.

Paisa, training agirtem dang kanga nendaka inyaksü mepishiba den külemi alima lendong balala atalokdang teyari nüngdakbapurtem yaritsü atema renema alitsü ayongzüka liasü.

Kasa sentong nung State Relief & Rehabilitation Officer, NSDMA, Jonjibemo Odyuo-i okila jembia liasü.

Nagaland nung...

(TAPAK 1 NUNGI)

Nagaland nung community biodiversity conservation maparen tenzükogo aser itemji Sendenyu, Kanglatu, Dikhu green zone aser Khonoma nature conservation amala nung inyakdar, ta paisa shisem.

Sentong nung NSBB chairman T. Lotha, IFS (Rtd)-ia o jembidang, alima nung meimchir alitsüba arem-min aser idakji aliba shirurtem dak keta lir. Asenoki arem-min aser shirurtem melii melitetsü, ta ashi.

United Nations General Assembly-i 2017 küm ya 'International Year of Sustainable Tourism for Development' ta sangoktsüogo aser iba atema United Nations World Tourism teloki ketdangsüa mapa jenti inyakdar. UN-i shimtetba omen den liromedema "Biodiversity and sustainable tourism" omen shim.

Sentong nung NSBB member Prof. Sapu Changkija-ia kaketshirtem ayongzüka o jemi.

International Day for Biological Diversity sentong nung Kohima district kübok school 16 nungi kaketshirtem aden. Sentong nung Kohima Harvest Church pastor, Swedesul Luhoi temoatsü meshia sarasadem. The Vineyard School kaketshirtemi ken ka aten aser Keneizeno Seletsu-i anküp tepela o jemi.

MELENSHITSÜR

Tir Yimyim adok 17/05/17 tapak 11 nung, NPF 26 Aonglenden A/C (Ungma Unit) 'Sangdonger' ta adokba column nung, Smti Atula Vice President 26 A/C ta alibaji, Vice President Mokochung Division ta melenshitsür.

Sd/-
Toshinungba, President

Sd/-
Bursuwa, G.Secretary

WAMEKEN SENSO REVIVAL

OMEN: "NISUNGSHIA DANGI TEKÜMTET OSANG"
ANOGO: 29TH -30TH MAY 2017

TONGTIO JEMBIR : Rev. T. Meren Jamir
Soul Saving Mission

TAYONGER : WAMEKEN BAPTIST CHURCH
QUASQUI CENTENARY PLANNING
COMMITTEE

SENTONG - I

Anogo: 30th May 2017 Mapang: 6 :00PM

MENDEN : MRS. ARENLAYADEN - A/P(W)

1. Lai zünga sarasademtsü : Mr. I. Kora Jamir-Missionary, Wadangtep Mission
2. Tayongzüka O : Mr. Chuba - Pastor W.B.C
3. Tajungshi O : Mr. I. Wati Jamir V.C.C
4. Ken atentsü : W.B.C. Women Dept.
5. Tsüngrem O :

SENTONG - II

Anogo 30th May 2017 Mapang: 10:00 am

Menden : Ms. Esther - Missionary I.E.F

1. Lai zünga sarasademtsü : Mr. N. Meri Longkumer
2. Ken atentsü : Wameken Sensotsür Telongjem, Tzüdikong
3. Tsüngrem O :

SENTONG - III

Anogo: 30th May 2017 Mapang: 3 :00 PM

Menden : Mr. Allem Longkumer - Secy. T.T.B.C

1. Lai zünga sarasademtsü : Mr. L. Noksang. Senso Missionary
2. Tepela O : Mr. L. Tongpang - Convener Q.Q.C. Planning Committee
3. Ken atentsü : Wameken Sensotsür Telongjem, Tuli Town
4. Tsüngrem O :

TEMETETSÜ

1. Iba sentong nung prokshia aliba senso aser anük apang ajak arua adentsü ayongzüker.
2. Iba osang dak alaka unit shia dangi official shidi meyoker.
3. Iba sentong asoshi ajaki sarasadema atadi .

OFFICE OF THE TZÜRANGKONG KAKETSHIR MUNG DANG

RAFFLE DRAW

IN AID OF

Tzürangkong Students Conference for the forthcoming NSF Conference 2017

1st Prize: Sl.No. 3935 **2nd prize :** Sl.No. 2755

3rd prize : Sl. No. 3351

10 CONSOLATION PRIZES: Sl. Nos. 2860, 2802, 3680, 0656, 1402, 3422, 4044, 3879, 3492, 0700

Original ticket should be produced to claim the prizes, on or before 29th MAY 2017

Sunep Yaden
G.S. TKM

OFFICE OF THE SALULAMANG KAKETSHIR TELONGJEM

TENUNGSANG AGÜTSÜR

Taküm 2017 HSLC aser HSSLC tatidang nung shirnokisa takok tajung ngutetogo, nenok ajak nem tenüngsang tulu agütsür aser tarutsü nunga nenok wadang balala nung takok leni aniang ta teyanglur Tsüngrem dang sarasademtsür.

Sd/-
Imnakümzük Jamir
President

Sd/-
Imtikazung Pongen
Secretary

KAKET NUNG TEMELENSHI SANGDONGER

May 19 nü 2017, Mopungchuket Village Council aser kaketsür T. Senka Ao, mensem ka mena, "Mulungnok" kaketsür page 43 nung "Etiben daka tajitetsü liasü ta jembir" ta aliba orenji kaketsür nungi intoker ta telemtetba agiba sangdonger.

Sd/-
Aosadang
Chairman
Village Council Mopungchuket

Sd/-
T. Senka Ao
Author "Mulungnok"

KANGA PELAR



ASO: 1937

ASÜ: 2017

Asür Songsongrenla Ungma W/o Imtimeren Lkr

Onoki kanga meima aliba ojalai ajungbena onok toktsür iba lima nungi pilaba anogo nung onok mulung zürepä aser nüktsü agi ananger aliba mapang kiyonger, yimer yimsanger, kidang kimang, aser onok meimertem ana aser talang nungi arua ozü asükhü mulung sünepeja nübu, rongsen, shisatsü aser sarasadem agi yaritepa tepela onoki tsüngdong arua nenok ajak den melemsateptet nung, ozü mulungnen o iba osang kaketsür ajanga nenok ajak den lemsateper. Teyanglur Tsüngremi nenok ajak meneni moajngma.

Temeim Kinungbo, Chirnur, Anükapang

Alverge Academics and Careers

A subsidiary unit of Alverge Services - Dimapur

Free counseling for 2017-18 for the below listed courses

BE/B.Tech, MBBS, BDS, Nursing, B.Pharm, BCA, MCA, BBA, MBA, BSc/BCom (all branches), Diploma, Lateral entry into Engineering

Asen lima higher studies azüngtsü bushitepdang sen aser nübo kanga indoker, aser tia maker karbo memetetba nisung nem külakokdaksür. Iba tia ajiteta **ALVERGE ACADEMICS AND CAREERS** koba Dimapur nung **ALVERGE SERVICES** indang education counseling branch ka lir, iba ajanga tanurtem admission den sendakba nung teyari agütsür.

Contact: 8011335158 / 7085270049 / 7005139093

Office of the

Lion's Club Longsa Mokochung Nagaland

H.Q.Longsa 798601

TENUNGSANG AGÜTSÜR



Longsa 'Sangu mepu' Lion's Club Platinum Jubilee 2017 sülen lanurtemi meranga bushiba aser inyakba nungi tematiba jenjang lenjang balala nungi takok tulu ngutetba senso ajak dangi metetdaksür.

1. **Mr.Mangliyangba** S/o Jongshikaba Common Educational Services (C.E.S) NPSC exam nung takok ngua P.G.T jenjang ngutetba.

2. **Mr.L.Longtsükümba** S/O P.Limawati, Mumbai nung ayongba 13th to 14th May 2017 ALL INDIAN MIXED MARTIAL ARTS FEDERATION (AIMMAF) Indian amateur nationals bantam weight (61 kg) category nung Nagaland Combat Academy nungi asayaa Gold medal angu.

Takok angur ajak nem tenüngsang tulu agütsür aser nükjidong tongtetbaji Tsüngrem aser nübur asoshi amshiangma.

Iba den külemi club member HSLC aser HSSLC exam 2017 nung takok angu ajak nem tenüngsang agütsür.

Sd/-
L. LANUTUSHI JAMIR
President

Sd/-
NUNGSANGOBA
Gen Secy

OFFICE OF THE EASTERN CHRISTIAN COLLEGE (ARTS & COM)

PADUMPUKHURI, DIMAPUR
AFFILIATED TO NAGALAND UNIVERSITY, RECOGNISED BY UGC

ADMISSION OPEN

- > B.A. 1st Sem. B. Com-1st Sem & Evening shift
- > Class- 11 (Arts & Com), with hostel facilities

College also offer additional courses:

- > NCC Air Force Wing
- > Skill Development classes.

CLASS WILL COMMENCE FROM 29TH MAY 2017.

Students may contact the college office for further information during office hour. Time : 9:00 am - 1:00 pm

Please contact : 03862 -224098 (O) 9612 904883

Sd/-
Administrator

Kohima nung angati football grassroots camp tenzükogo



Kohima, May 22: Kohima nung angati football grassroots camp nung shilem agirtem tangokba noksa nung angur.

Kohima, May 22 (TYO): Local Ground nung May 22 Nagaland Football Coaches Association (NFCA)-i Tanurtem arishi küm 6 nungi achaayanga "Make Football Happen" omen nung ajemdaker anogo 5 atema angati football grassroots camp ka Kohima Osangbenertem den

jembidang NFCA tir, Roko Angami-i ashiba agi, iba football camp ya grassroots jenjang nung football ajungkettsü nükjiding nung tenzük, koba football temaba jenjangi ajungkettsü asoshi tongtibangtiba lir.

Paisa ashiba agi, iba sentong district ajak nung agitsü asoshi Association sentong lir. Maneni grassroots jenjang nung asayamong ayonga akatsü asoshia sentong lir.

Camp tenzüksüba mapang anogoshia nikongtsütsü 3:30 ako nungi tenzüksü, ta temelenshi ka ketdangertemi metetdaksü.

Real Madrid-i La Liga kokogo

Madrid, May 22 (Agencies): Real Madrid teloki Deobarnü Malaga madak goal 2-0 agi koka La Liga title 33ben buba benogo. Iba takok ya parnok asoshi küm 5 tsüngda nung mezüngbuba alitsü.

Asaya tenzük minute ana buba nung Ronaldo-i goal ka agütsü aser iba sülen asaya tanabuba shilem tenzük minute 10buba nung Benzema-i tanabuba goal agüja parnoki iba asaya akokba den külemi La Liga title akok.

Madrid telok tanabuba jenjang nung liasü saka Barcelona telok dang nungi point 3 talila nguteta iba title akok. Luis Enrique asoshi Barca coach ama tatembangbuba asaya nung

par teloki Eibar goal 4-2 agi akok saka title akoktsü asoshi ibaji teberi masü liasü. Parnoki taküm La Liga title akok asünungbo parnoki küm asem atonga iba title akoker süla.

"Kodang league title kokdir ajak asoshi kanga tongtibang lir aser iba takok ya Real Madrid asoshi kanga tongtibangtiba lir kechiyong iba club ya alima nung tajungtiba lir," ta Madrid coach Zinedine Zidane-i ashi.

League akoktsü asoshi Real pur point ka dang nüngdaka liasü.

"Iba takok ya asaya 38 tashi kanga jung asayatetba sempet lir. Iba teloki iba takok angutsü temsüa lir," ta Madrid captain Sergio Ramos-i ashi.

CM-i indoor tennis stadium lapoktsütsü

Dimapur, May 22 (TYO): Kohima, Indira Gandhi Stadium Complex nung Indoor Tennis Stadium atema nüngshilong azüngba sentong 2017, May 23 nü anepdang 10:00 ako nung agitsü.

Iba sentong nung Nagaland Chief Minister, Dr. Shurhohelie Lezietsü tongti tesemdang alitsü. Iba sentong ya Nagaland Tennis Association-i achaayanga akatsü.

Manipur nungi Neroca FC teloki I-League 2nd Division akok

New Delhi, May 22 (Agencies): I-League Second Division nung Manipur nungi Neroca FC teloki Lonestar Kashmir telok nem goal 4 agüja iba takok amrok benogo. Northeast nungi Neroca FC telok ya mezüngbuba iba I-League Second Division akoker asütsü. Asaya tatem nung Neroca FC-i goal 4 aser Lonestar Kashmir teloki goal 1 agütsüteta asaya tembang.

Kashmir nung takok anguba ajanga Neroca FC telok ya asaya 9 nungi points 23 ngutet aser Kolkatas Southern Samity telok dang nungi point 7 agi timba akum.

"Aizawl FC-i takok anguba sülen anu North East nungi telok kati nisan azük nung yimdaksü,"

ta AIFF general secretary, Kushal Das-i Neroca FC tenüng sanga ashi.

"Iba takok ajanga saisapong nung shilem agitsü tali ajungshitsü ni amanger, aser iba ji Manipur nungi tenzüksü," ta pai shisem.

Zonal round asayadang Mohammedan Sporting den 2017 January nung tamakok aluba dak alaka Neroca FC ajanga Lonestar Kashmir FC madak takok anguba densema asaya 12 nung khen-a tamakok malui asayatet.

Final round asayadang, Raikhan-i sayuba Neroca FC nem tangar teloki asaya 8 nung goal asem dang agütsütet saka par teloki goal 15 dang tali agütsüteta liasü.

PKL nung Pakistan nunger masayadaksütsü

New Delhi, May 22

(Agencies): Sorkari Hombarnü taruba ita Pro Kabaddi League (PKL) tenzüksü aliba nung Pakistan nunger-i kiralongrar yariba manen tashibo parnok asayatem masayadaksütsü ta jangjangja metetdaksüogo.


Iba league 5buba season June 25 nungi tenzüksü. Mezüngbuba asaya nung Punei Paltans aser Telugu Titans na Pune nung asayatsü.

Osang ajanga ashiba agi, iba league atema asayatem auction asüba nung Pakistan nunger asayatem den züngsemsü.

"League ayongertemi parnok ajatsü akok saka parnoki parnok masayadaksütettsü. Parnok asayatsü asoshi shimaka parnok

asü arudaksütsü asü marudaksütsüar ajibo India sorkari telemtetba agitsü. Pakistan nungeri kiralongrartem yariba manen tashibo parnok den asayatsüji tamakoktsü lir," ta Sports Minister Vijay Goel-i ashi.

Pakistan nunger hockey aser cricket asayatem mapang tatsüka atema India nung masayadaksüi arudar. Pakistan military court ajanga taoba ita Indian nunger Kulbhushan Jadhav südaksütsüba ozüng agütsüba sülen linük ana tsüngda tesendaktep tamajungba kümogo. Jadhav ya taoba küm March 3 nü apu. Iba telemtetba India-i International Court of Justice (ICJ) nung benok aser iba court ajanga pa tepsettsüba maparen anena atatsü asoshi tetuyuba agütsü.



Baptist Higher Secondary School


P.O.: Mangkolemba, Nagaland

Motto: "Go and Teach"


FELICITATION

The Baptist Higher Secondary School, Mangkolemba takes great pride for the excellent achievement by our students in the HSLC & HSSLC Examination 2017. We salute the accomplishment in you.


Students with distinction mark in HSLC Exam;




Mr. Saku T. Pongen
% Secured : 91%



Mr. Longkhumtoshi
84%



Mr. Temsuwati
% Secured : 83%



Ms. Sungjemmenla
81%

HSSLC (Arts) Result	HSLC Result
Total Appeared : 13	Total appeared : 24
First Division : 07	First Division : 22
Second Division : 05	Second Division : 02
Third Division : 01	

We would also like to extend our hearty congratulations to the teachers for your sincere and dedicated service. We uphold you with earnest prayer for the manifold blessings in your future endeavours.

Date: 19 May 2017

Sd/-
Chairman
Managing Board

Sd/-
Principal
BHSS, Mangkolemba



Tanurbo tanur dang !
Yimtung nung ayokba
chiyongtsütem achitsübasä !
Tetsü shia teinyaktsü timji.
Tanur temang anepalua
anema lidaktsütsübaji lir

LIVSAV FOR KIDS

NEW PACK

Combinative Appetite Enhancer

Manufactured by Medhava Research Health Products Pvt. Ltd. (Maharashtra),
CUSTOMER CARE:- 020-4581183

BILEMDANGANG
"Asenoki kechi bilemer, iba ama asenok akumer."